


प्रसार भारती  
प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन

18.45 मंगलवार

दिनांक 26.05.2026



**प्रमुख समाचार –**

- 1- प्रधानमंत्री नरेन्द्र मोदी के अगुवाई में एनडीए सरकार ल आज बारह बछर पूरा होंगे—मुख्यमंत्री विष्णुदेव साय ह प्रधानमंत्री ल दीन बधाई।
- 2- छत्तीसगढ़ योग आयोग के अध्यक्ष रूपनारायण सिन्हा के आज निधन होंगे।
- 3- राज्य सासन ह ईद—उल—अजहा यानी बकरीद के मउका म घोषित छुट्टी म बदलाव करे हे—सत्ताईस के जघा अब अट्ठाईस मई के रइही छुट्टी।

**एनडीए सरकार—बारह साल**

प्रधानमंत्री नरेन्द्र मोदी के अगुवाई में एनडीए सरकार ल आज बारह बछर पूरा होंगे हे। ए मउका म छत्तीसगढ़ के मुख्यमंत्री विष्णुदेव साय ह प्रधानमंत्री ल सोशल मीडिया प्लेटफॉर्म “एक्स” म बधाई दीन हे। मुख्यमंत्री ह कहिन कि प्रधानमंत्री के दूरदर्शी, निर्णायक अउ जनकेन्द्रित अगुवाई म भारत ह सेवा, सुरक्षा, आत्मविश्वास अउ विकास के नवा युग म पहुंचत हे। श्री साय ह कहिन कि पाछु बारह बछर म प्रधानमंत्री ह सेवा, सुशासन अउ अंत्योदय के भावना ल केन्द्र म राखत ए सुनिश्चित करे हे कि विकास के फायदा समाज के आखिरी मनखे तक पहुंचे। ओमन किहीन कि गरीब, किसान, माईलोगिन, युवा अउ जनजातीय समाज के जीवन म सकारात्मक बदलाव लाय के जउन संकल्प प्रधानमंत्री ह लीन हे, ओ ह आज देस के हरेक जघा दिखाई देवत हे।

**आदर्श शहर समृद्धि योजना**

राज्य सरकार ह नगर पालिका अउ नगर पंचायत के समग्र विकास बर “आदर्श शहर समृद्धि योजना” सुरू करे के घोषणा करे हे। योजना के पहिली चरण म प्रदेश के बत्तीस नगरीय निकाय के चयन करे गेहे। एमा बस्तर, सरगुजा अउ रायपुर संभाग के छह—छह अउ बिलासपुर संभाग के नौ अउ दुरुग संभाग के पांच निकाय सामिल हे। एमा सड़क, जल आपूर्ति, ड्रेनेज, परिवहन, पार्क, आवास, ई—गवर्नेंस, स्मार्ट ट्रैफिक अउ हरित क्षेत्र समेत नागरिक सुविधा के विकास करे जाही। योजना के तहत काम के चुनई अउ निरीक्षण बर संभाग स्तरीय समिति के गठन करे गेहे, जउन मन ल पन्द्रह दिन म कार्ययोजना तैयार करे के निरदेस दे गेहे।

मुख्यमंत्री विष्णुदेव साय ह कहिन कि आदर्श शहर समृद्धि योजना प्रदेश के सहरी विकास ल नवा गति अउ नवा दिसा देके काम करही।

**मुख्यमंत्री—खरीफ सीजन**

प्रदेश म अवइया खरीफ सीजन के तैयारी ल देखत मुख्यमंत्री विष्णुदेव साय ह किसान मनके हित म निरदेस देहे। ओमन कहिन हे कि ट्रैक्टर ले जुताई अउ सिंचाई पंप बर किसान मन ल जरूरत मुताबिक डीजल के व्यवस्था

सुनिश्चित करे जाय, जेखर ले खेती-किसानी के काम प्रभावित इन होवय। खबर के मुताबिक राज्य म पेट्रोल-डीजल के दुरुपयोग ल रोके बर ड्रम अउ अउ जरीकेन म ईंधन वितरण म लगे रोक म किसान मन ल छूट दे गेहे, जेखर ले खरीफ काम बाधित इन होवय।

### रूपनारायण सिन्हा-निधन

---

छत्तीसगढ़ योग आयोग के अध्यक्ष रूपनारायण सिन्हा के आज निधन हगे। मिले खबर के मुताबिक श्री सिन्हा बिलासपुर म राखे गे भारतीय जनता पार्टी के दू दिन के प्रसिक्षण कार्यक्रम म सामिल होय बर गे रिहीन। ए दउरान उंखर तबीयत बिगड़े म ओमन ल बिलासपुर के सिम्स म भर्ती कराय गीस, जिहां डॉक्टर मन ह ओमन ल मृत घोषित कर दीन। रूपनारायण सिन्हा लंबा बेरा ले भाजपा संगठन ले जुड़े रिहीन।

उंखर निधन म मुख्यमंत्री विष्णुदेव साय अउ विधानसभा अध्यक्ष डॉक्टर रमन सिंह समेत भाजपा के बड़का नेता मन सोक जताय हे।

### बकरीद-अवकाश

---

राज्य सासन ह ईद-उल-अजहा यानी बकरीद के मउका म घोषित छुट्टी म बदलाव करे हे। सामान्य प्रशासन विभाग डहार ले जारी आदेस के मुताबिक प्रदेश के जम्मा कार्यालय, विभाग अउ सरकारी संस्थान मन म अब सत्ताईस के जघा अट्ठाईस मई के छुट्टी रइही। ए फइसला चांद दिखे के संभावित तारीख अउ तिहार ल ध्यान म राखत ले गेहे।

### राज्यपाल-पीएम जनमन योजना

---

राज्यपाल रमेन डेका ह आज लोकभवन म प्रधानमंत्री जनजाति आदिवासी न्याय महाअभियान-पीएम जनमन योजना के समीक्षा बइठका लीन। बइठका म पीएम जनमन योजना के तहत ग्यारह बिन्दु उपर चर्चा करे गीस। राज्यपाल ह विशेष पिछड़ी जनजाति मन बर मंजूर करे गे प्रधानमंत्री आवास योजना के काम ल जल्दी पूरा करे के निरदेस दीन। ओमन जनजातीय क्षेत्र के रद्दा के खराब स्थिति म नाराजगी जतावत अधिकारी मन ल गुणवत्ता के संग सड़क बनाय बर कहिन।

### नवा रायपुर-एसईजेड

---

राज्य सासन ह नवा रायपुर म इलेक्ट्रॉनिक्स अउ इंजीनियरिंग आधारित दूसर विशेष आर्थिक क्षेत्र-एसईजेड स्थापित करे ल मंजूरी दे देहे। एखर तहत पॉलीमेटेक इलेक्ट्रॉनिक्स लिमिटेड डहार ले दस हेक्टेयर ले जादा क्षेत्र म सेमीकंडक्टर अउ इलेक्ट्रॉनिक्स उत्पाद के निर्माण करे जाही। नवा रायपुर म बनइया ए विशेष आर्थिक क्षेत्र राज्य के निर्यात ल बढ़ावा देके संगेसंग नवा निवेस आकर्षित करे अउ छत्तीसगढ़ ल वैश्विक इलेक्ट्रॉनिक्स आपूर्ति श्रृंखला ले जोड़े म बिसेस भूमिका निभाही।

मुख्यमंत्री विष्णुदेव साय ह कहिन हे कि सेमीकंडक्टर तकनीक भविष्य के जरूरत हे। ओमन कहिन कि नवा रायपुर म राज्य के पहिली सेमीकंडक्टर निर्माण संयंत्र स्थापित होय ले छत्तीसगढ़ के तकनीकी भविष्य के नींव मजबूत होही। संगेसंग युवा मन ल रोजगार घलो मिलही।

## आंगनबाड़ी केन्द्र—भवन स्वीकृति

---

राज्य सरकार ह बस्तर संभाग के जिला म चलत बांचे पांच सौ छह बिना भवन के आंगनबाड़ी केन्द्र मन बर भवन मंजूरी के काम ल तेज कर देहे। मुख्य सचिव स्तर म पाछु सोलह मई के राखे गे समीक्षा बइठका म बस्तर संभाग के हरेक ग्राम पंचायत म आंगनबाड़ी भवन निर्माण ल सासन के प्राथमिकता बतावत संबंधित जिला कलेक्टर मन ल निरदेस जारी करे गेहे। आंगनबाड़ी भवन निर्माण बर हरेक भवन बर ग्यारह लाख उनहत्तर हजार रुपिया के रासि निर्धारित करे गेहे।

मुख्यमंत्री विष्णुदेव साय ह कहिन हे कि सरकार के लक्ष्य नक्सल मुक्त घोषित जिला मन म आंगनबाड़ी भवन के निर्माण कराना हे। ओमन अधिकारी मन ल निर्माण काम ल गुणवत्ता के संग करे के निरदेस दीन हे।

## तेंदूपत्ता गोदाम—आगजनी

---

बीजापुर जिला के ईटपाल स्थित एक तेंदूपत्ता गोदाम म आगी लगे ले करीबन दस करोड़ रुपिया ले जादा के तेंदूपत्ता जलके राख होगे। ए घटना म गोदाम के स्ट्रक्चर ल करीबन दू ले तीन करोड़ रुपिया के नुकसान होय हे।

बस्तर वृत्त के मुख्य वन संरक्षक आलोक तिवारी ह बतईन कि गोदाम म आठ फड़ म राखे गे तेंदूपत्ता म काली आगी लग गे। ओमन बतईन कि घटना के जानकारी मिलतेच कलेक्टर अउ पुलिस अधीक्षक के संगेसंग वरिष्ठ अधिकारी मउका म पहुंचीन। फेर अभी आगी लगे के कारण के पता नइ चल पाय हे। प्रशासन अउ संबंधित विभाग की टीम मन जांच म जुट गेहे।

मिले खबर के मुताबिक करीबन सत्ताईस हजार चार सौ स्ववेयर फीट मुफैले ए गोदाम म लगे आगी म चौबीस घंटा के बाद घलो काबू नइ पाय गेहे।

## डिजिटल अरेस्ट—आरोपी गिरफ्तार

---

बिलासपुर पुलिस ह डिजिटल अरेस्ट के मामला म दू झिन आरोपी ल गिरफ्तार करे हे। दूनों आरोपी मन ह एक झिन सियान माईलोगिन ल आतंकवादी संगठन के आदमी बताके आने—आने खाता म एक करोड़ चार लाख रुपिया ले जादा के पइसा जमा करा लीन। पुलिस ह दूनों आरोपी मन ल गिरफ्तार करके जेल भेज देहे। आरोपी मन डहार ले बउरे गे नौ सौ आने—आने बैंक खाता के पता चले हे। ए जम्मा खाता म कुल मिलाके तीस लाख रुपिया जमा हे, जेला होल्ड करवाय गेहे।

## राष्ट्रीय आम महोत्सव

---

रईपुर के इंदिरा गांधी कृषि विश्वविद्यालय म उनतीस ले इकतीस मई तक राष्ट्रीय आम महोत्सव के आयोजन करे जाही। ए महोत्सव म कृषि मंत्री रामविचार नेताम ह किसान अउ आम उत्पादक मन ल संबोधित करही। उद्यानिकी अउ प्रक्षेत्र वानिकी अउ इंदिरा गांधी कृषि विश्वविद्यालय के सामलात तत्वावधान म राखे गे ए महोत्सव म आम के आने—आने किस्म के प्रदर्सनी लगाय जाही। प्रदर्सनी हर दिन मंझनिया बारह बजे ले रतिहा नौ बजे तक लोगन मन बर खुल्ला रइही।

## थोरकुन समाचार सार म –

–पेट्रोल–डीजल के बाद अब सीएनजी के कीमत म दू रूपिया प्रति किलोग्राम के बढ़ोतरी करे गेहे। नवा कीमत आज ले लागू हगे हे।

–एंटी करप्शन ब्यूरो–एसीबी के टीम ह मनेन्द्रगढ़–चिरमिरी म बिजली विभाग म पदस्थ कनिष्ठ अभियंता अउ लाइनमेन ल साढ़े नौ हजार रूपिया के रिश्वत लेवत रंगेहाथ गिरफ्तार करे हे।

–उहें, बेमेतरा म एसीबी ह जमीन के बटांकन अउ खाता विभाजन करके ऋण पुस्तिका बनाय के एवज म रिश्वत मांगे के आरोप म पटवारी ल गिरफ्तार करे हे।

–अकलतरा पुलिस ह पोस्ट आफिस म पदस्थ सहायक डाकपाल खाताधारक मनके खाता ले उन्नीस लाख इक्कीस हजार रूपिया के गबन के आरोप म गिरफ्तार करे हे।

– रायपुर पुलिस ह कोलकाता अउ हरियाणा म दबिस देके आईपीएल क्रिकेट मैच म सट्टा लगइया छब्बीस आरोपी मन ल गिरफ्तार करे हे। इंखर तीर ले सत्रह लाख रूपिया नगद, चारपहिया गाड़ी समेत आने–आने सामान बरामद करे गेहे।

